

DI'IDZA' BZU SAN PABLO APÓSTOL LĒ'Ē GUICHI, USE'ELA'NĒ'N LAO ESTADO GALACIA

Ni rguixogue'n ca naca
guichi bē San Pablo

1 Nē'ēdi', Pablo, bdē' Diuzi
nē'ēdi' ta tzetixogui'a benē'
xti'idzē'. Cala benē' bdē' nē'ēdi',
dechan' bdē' cuin Jesucristo lēnē'
Xuziro Diuzi nē'ēdi'. Naca Diuzi ben'
pseban Jesucristo. ²Nē'ēdi'lia' ben'
bichiro, ben' nao xneza Jesús, ben'
nita' niga ga zua', bēndo' guichi
ni ta ise'ela'ndo' lao le'e, ben' nao
xneza Jesús, ben' nita' estado
Galacia. ³Rulidza' Xuziro Diuzi lēnē'
ži'inē' Jesucristo ta huela'iyaquē'
le'e cuēchiyaquē' chizi laxta'ole.
⁴Naca Jesucristo ben' pseydin
cuine gutinē' lē'ē yaga cruzo por
nun quie dan' ta gažo dula' quiero
quie tamala de lao yedyi layu.
Cana' bēnē' quiero según ca re'en
Xuziro Diuzi gaca quiero. ⁵iRa'o na',
reya'ala' gapala'nro Diuzi tuzioli!
Amén.

Tuzi neza de yenaoro yeyoro guibá

⁶Lega rebaneda' le'e ca ruele
laozulaotele rusanla'adyi'le xneza
Diuzi, ben' ulio le'e por nun

quie nadyē'ē Cristo le'e. Baziote
zenaole neza tula, pero cala neza
ta yeyole guibá. ⁷Talicazi na' tuzi
neza de ta yeyoro guibá. Ca naca
ta raca quiele, nita' yaca benē'
ruquixiyaquē' quiele. Re'enjē'
bigalele ca udixogue'ndo' le'e
quie xneza Cristo yenaoron
yedyinro guibá. ⁸Udze'de' Diuzi
nu ben' re'en usanla'adyi'le cabē'
baodixogue'ndo' le'e dza na'te quie
xneza Cristo ta re'enjē' yenaole
neza tula, neza ta biyedyinle guibá.
Udze'de' Diuzi nuti'tezi ben' rue
cana', la'acazi nē'ēdi', la'acazi nu
ángel za' guibá. ⁹Lena' agudya' le'e
dza na'te, pero na'a re'enda' inia'
le'e tatula de que udze'de' Diuzi
nuti'tezi ben' re'en usanla'adyi'le
cabē' baodixogue'ndo' le'e quie
xneza Cristo dza na'te ta yenaole
neza tula.

¹⁰La'acazi le'e birapale gusto
cabē' rnia' le'e niga, pero Diuzi
sí, rapē' gusto. Birguiloga' nu
ben' hue nē'ēdi' ben' že. Chan'
rguiloga' nu ben' hue nē'ēdi' ben'
že, na'ra bira zaca' hua' dyin quie
Cristo.

**Ni rguixogue'n cabè' guca
quie Pablo guquè' apóstol**

¹¹Pero reya'ala' huele pensari cabè' rnia' le'e ni, bicha'. Cala pensari quie benè' rguixogui'a le'e, dechan pensari quie Diuzi ta yenaole xneza Cristo yeyole guibá.
¹²Cala benè' bzioñe'enè' nèle'di' ca naca xneza Cristo, dechan' cuin Jesucristo bzioñe'enè' nèle'di'.

¹³Le'e babele cabè' guca quia' dza na' cati benaohua' rua' cabè' naca costumbre quie xuzixta'ohua' ben' Israel. Banezile lega psebi'a xneza Cristo. Uya'a yadiloga' yaca ben' nao xneza Cristo ta udyiaya'yaquè', bibeyèchi'la'adya'yaquè'.
¹⁴Dyè'èdi gula benaohua' cabè' naca costumbre quie xuzixta'ohua' ben' Israel. Nunu yaca ben' gololia' lèbizi, bërayaquè' ca nèle'di'.
¹⁵Pero tu binegaloga' bdè' Diuzi nèle'di' tanun quie dan' nadyè'ènè' nèle'di'.
¹⁶Caora abdyin hora una Diuzi, na'ra bedetilalao ži'inè' Jesucristo nèle'di', yela' na' quixogui'a ben' binaca ben' Israel ca naca xneza Cristo yenaoron yedyinro guibá. Beyudyi guca quia' cana', nunu yenaba' consejo.
¹⁷Ni ciudad Jerusalén biuya'a tzenaba' consejo lao yaca ben' banaca apóstol tu binegaca' apóstol. Biuya'a na', pero biudzèda' uya'a yu nebaba Arabia. Na'tera zeza'a uya'a ciudad Damasco.

¹⁸Baocara tzona iza, caora na' uya'a ciudad Jerusalén bedila' Pedro uzulia'nè' chi'inu' dza.
¹⁹Nunura apóstol bedila'. Tuzi Pedro len Santiago, ben' naca ben' bichi xa'nro Jesucristo, bedila'.

²⁰Ruguntia' Diuzi nacan tali cabè' di'idza' ruzua' lè'è guichi niga.

²¹Ude beyudyi na', uya'a yu nebaba Siria. Na'tera uza' za'a yu nebaba Cilicia.
²²Binuebè' yaca ben' nao xneza Cristo, ben' nita' yu nebaba Judea, nèle'di'.
²³Na' tu beziyaquè' con cabè' na benè' ca bia' dza na'te. Unezियाquè' cabè' bia' beguiloga' ga nita' ben' nao xneza Cristo ta udyiaya'yaquè'. Pero na'a bira rua' cana', barda' rguixogui'a benè' xti'idza' Diuzi re'enda' inaoyaquè' xneza Cristo. Tanun quie barnaohua' xneza Cristo na'a,
²⁴cana' rue yaca benè' Diuzi ben' že.

**Yaca ben' naca apóstol
bèjè' Pablo tuže**

2 Na'ra baguca chida' iza beya'a ciudad Jerusalén tatula. Uza'lè Bernabé nèle'di' uquiè'ndo' Tito.
²Beya'a na' tatula porque Diuzi na' bènè' mandado beya'a. Gan' na' bedila' ben' napa dyin quie ben' nao xneza Cristo. Caora na' bexi'idze'yaquè' con cabè' rua' rguixogui'a ben' binaca ben' Israel xti'idza' Diuzi. Cana' bia' tacuenda biten cana'zi dyin quie Cristo rua'.
³Na' bega'nndo' di'idza' dyè'èdi. Nica bèjè' mandado su compañero quia' Tito tu xèdyidao' cuine como dan' binacan obligado su tu xèdyidao' cuin ben' binaca ben' Israel.
⁴Pero tali na' gu'un bala yaca ben' na', ben' nazi naoyaquè' xneza Cristo, su tu xèdyidao' cuin Tito. Quie lena' balarazi za'yaquè' urè'naoyaquè' nèto' ta si'jè' cuenda bi ruendo'. Biraxejè' ca ruendo' como dan' tanun quie nuendo'

tuže Jesucristo nacando' ben' libre. Re'enyacuè' yenaondo' ley pca'n Diuzi lao na'a Moisés tatula. ⁵Pero ni tzadica' bibëndo'yaquè' lato huelëyaquè' nëto' como dan' re'enndo' huele seguir inaole xneza Cristo yeyole yedyinle guibá.

⁶Na' yaca ben' napa dyin quie ben' nao xneza Cristo yaxejè' cabè' rua' bibetza'yaquè' ca naca dyin quie Diuzi za'a rua'. Pero chi ben' napa dyin, chi ben' binapa dyin, tuzicazi ca raqueda' como dan' ilè'ècazi Diuzi ra'o cabè' naca pensari yu'u lu'u guicho laxta'oro, cala cabè' naca žabaro. ⁷Na'ra bibetza'yaquè' ca naca dyin quie Diuzi za'a rua', gucabè'yaquè' chi Diuzi bënë' nē'èdi' mandado rguixogui'a ben' binaca ben' Israel xti'idza' Diuzi ta hue quieyaquè' len, na' yezi' Diuzi leyaquè' guibá. Lëbi cabè' gucabè'yaquè' bë Diuzi Pedro mandado quixogue'nè' yaca ben' Israel xti'idza' Diuzi, cana' gucabè'yaquè' Diuzi bënë' nē'èdi' mandado quixogui'a xti'idzè'. ⁸Pues lëbi cabè' bë Diuzi ulionè' Pedro use'elè' lëbè' ta tzetixogue'nè' xti'idzè' lao ben' Israel, lëzi cana' ulio Diuzi nē'èdi' tzetixogui'a xti'idza'nè' lao yaca ben' binaca ben' Israel.

⁹Quie lena' gucabè' Santiago, len Pedro, len Juan de que bë Diuzi tu tahuen quia', bënë' dyin quienè' hua'. Naca Santiago, len Pedro, len Juan ben' belao, ben' rudze' xnezi quie yaca ben' nao xneza Jesús. Na' redaohueyaquè' bënyaquè' nē'èdi'lia' Bernabé di'idza' žela'adyi'. Bega'nlëyaquè' nëto' di'idza' ta tziondo' nëto' tzetixogue'ndo'

ben' binaca ben' Israel xti'idza' Diuzi, tu na' tziyoaquè' leyaquè' tzetixogue'yaquè' ben' Israel xti'idza' Diuzi. ¹⁰Tuzi unayaquè' nëto' reya'ala' yeyèchi'la'adyi'ndo' ben' yèchi'. Pero cana'cazi rua' rapatzaguia' cuidado ta rua'.

Ciudad Antioquía udila Pablo Pedro

¹¹Na' cati bedyin Pedro ciudad Antioquía, cana' bedila' lëbè' na'. Na'ra udila' lëbè' como baoquixi pensari quienè'. ¹²Dza na' udaolè Pedro yaca ben' binaca ben' Israel. Pero cati bdyin bala ben' Israel, ben' naca amigo quie Santiago, na'ra psannè' bira udaolënè' leyaquè'. Cana' bënë' como dan' rdzebinè' ben' naca tu cue' ben' Israel, ben' re'en su tu xëdyidao' cuin yaca ben' nao xneza Jesús, la'acazi ben' binaca ben' Israel. ¹³Na'ra yaca los demás ben' nao xneza Jesús, ben' Israel, bërëyaquè' chopa neza quieyaquè' con cabè' bë Pedro. Hasta Bernabé, lëscana' bënë' tuže uquixi pensari quiè', bërènè' chopa neza. ¹⁴Cati blè'èda' ca ruejè', birnaojè' tali con cabè' rna xti'idza' Diuzi, na'ra unia' rëpa' Pedro zaca'lao lao yaca ben' nao xneza Jesús cani: “Luè' naco' ben' Israel, pero bira naolo' ley pca'n Diuzi lao na'a Moisés. Quie lena' rnaba' luè', ¿bixquien' re'enlo' huu' mandado inao yaca ben' binaca ben' Israel ley pca'n Diuzi lao na'a Moisés?” Cana' gucha' Pedro udilanè'.

La'acazi ben' Israel, la'acazi ben' tula, ruen zi rzudyi'ilëro Cristo ta yeyoro guibá

¹⁵Ra'o nacaro ben' Israel. Binacaro ben' binuebè' Diuzi cabè' naca yaca los demás ben' za' yedyi tula. ¹⁶Pero

dyë'ëdi neziro biil'ë Diuzi ra'o ben' laxta'o yëri tanun quie naoro ley pca'n Diuzi lao na'a Moisés, dechan' tanun quie chi rzudyi'ilëro Jesucristo. Quie tuzi len il'ë Diuzi ra'o ben' laxta'o yëri. Quie lena' lente ra'o, rzudyi'ilëro Jesucristo cuenda il'ë Diuzi ra'o ben' laxta'o yëri, porque cala tanun quie naoro ley pca'n Diuzi lao na'a Moisés yeyoro guibá.

¹⁷Pero ¿bizi huero chi rzudyi'ilëro Cristo, na'tera biyedyinro guibá? ¿Bizi huero chi tali ruen zi inaoro ley quie Moisés ta yezi' Diuzi ra'o? ¿Inaro dula' quie Diuzi chi raparo falta biyezi'në' ra'o? ¡Bireya'ala' inaro cana'! ¹⁸Pero xquia nacan quiero chi yenaoro neza gula quiero tatula, na' tu chi'zi uzudyi'ilëro xneza Cristo. ¹⁹Lao ley quie Moisés nuen quia' ca quie ben' huati, bira ruen në'ëdi' mandado. Pero lao Diuzi sí, binatia' nabana' ruenë' në'ëdi' mandado. ²⁰Naca quia' ca quie ben' gutilë Cristo lë'ë yaga cruzo. Bide yela' neban quia' cuinza', yela' neban quie Cristo rdalia' nabana' lao yedyi layu. Quie lena' decazi yela' neban quia' nabana' lao yedyi layu por nun quie dan' rzudyi'ilia' Cristo, ben' naca ži'i Diuzi, ben' nadyë'ë në'ëdi'. Ta gaca tahuen quia' psedyinnë' cuinnë' gutinë' lë'ë yaga cruzo por në'ëdi'. ²¹Biusanla'adya' ca naca yela' racalë quie Diuzi. Chi tali yezi' Diuzi ra'o por nun quie chi hue quiero cabë' na lao ley pca'n Diuzi lao na'a Moisés, na'ra huazaque' inaro bibi zaca'n guti Cristo lë'ë yaga cruzo.

Tuzi sudyi'ilëro Cristo il'ë Diuzi ra'o ben' laxta'o yëri

3 ¡Le'e, bicha', ben' estado Gálatas, aoca tondole! ¿Nuži

pquixi pensari quiele bira hue quiele xti'idza' Diuzi? Dyë'ëdi bl'ële baodixogue'ndo' le'e cabë' guca quie Cristo gutinë' lë'ë yaga cruzo. ²Rnaba' le'e tu di'idza': Caora cati uyu'ule Bichi Be quie Diuzi, ¿tanun quie bidan' uyu'ule? ¿Uyu'ule Bichi Be quie Diuzi tanun quie bë quiele cabë' di'idza' na lao ley quie Moisés, o chi tanun quie bë quiele cabë' di'idza' udixogue'ndo' le'e? ³¿Bizi raca quiele taže aotondole? ¿Ruele pensari cuinzile de fuerza valor quiele yenaole xneza Cristo, bira ruen zi gacalë Bichi Be quie Diuzi le'e? ⁴Taže baoca tazëdi quiele dan' naole xneza Cristo. Na'ra ¿bi ca nale? ¿Bibi zaca'n baozuele tazëdi guca quiele? Tahuen na' chi zaca'n gucalën le'e. ⁵Rnaba' le'e itu di'idza': Cati bdze' Diuzi Bichi Be quienë' lu'u guicho laxta'ole, bënë' yela' milagro quienë' entre le'e, ¿bixquien' bë Diuzi quiele cana'? Pues cala bë Diuzi quiele cana' tanun quie dan' bë quiele cabë' di'idza' na lao ley quie Moisés, dechan' bë Diuzi quiele cana' tanun quie dan' rzudyi'ilële Cristo cabë' aodixogue'ndo' le'e.

⁶Na' uzudyi'ilë Abraham Diuzi. Con lëzin bl'ë Diuzi lëbë' ben' laxta'o yëri, ben' nacalë lëbë' tuže. ⁷Quie lena' reya'ala' inezile naca dugalo ži'isuba Abraham nutezi ben' rzudyi'ilë Diuzi, la'acazi ben' Israel, la'acazi ben' za' yedyi tula. ⁸Diuzi, ben' bë mandado bzu yaca benë' xti'idzë' lë'ë guichi, unezinë' dza na'te de que sudyi'ilë yaca ben' binaca ben' Israel lëbë'. Cana' gaca quieyaquë' hual'ë Diuzi leyaquë'

ben' laxta'o yëri, ben' hue lëbë' tuže. Quie lena' una Diuzi dza na'te gudyinë' Abraham: "Huela'iya' yugulu ben' nita' lao yedyi layu tanun quio' luë'." Cana' una Diuzi gudyinë' Abraham. ⁹Na'ra cani nacan: Huela'iya Diuzi yugulu ben' rzudyi'ilë Cristo lëbizi cabë' bëla'iya Diuzi Abraham dza na'te.

¹⁰Pero udze'de' Diuzi nu yaca ben' sudyi'ilë cabë' mandado rue lao ley ta gata' yela' neban quienë' tuzioli. Lëtana' rguixogue'n lë'ë guichi la'iya quie Diuzi cani: "Yugulu ben' rue quie cabë' mandado rue lao ley, udze'de' Diuzi leyaquë' chi bihue quieyaquë' yugulute cabë' mandado ruen." Cana' rnën lë'ë guichi la'iya quie Diuzi. ¹¹Tali na' cala tanun quie dan' hue quiero cabë' mandado rue lao ley ilë'ë Diuzi ra'o ben' laxta'o yëri. Lena' rguixogue'n lë'ë guichi la'iya cani: "Tanun quie dan' sudyi'ilëro Diuzi, na'tera ilë'ënë' ra'o ben' laxta'o yëri, gunnë' ra'o yela' neban tuzioli."

¹²Pero taže netza'n quie nu ben' rue quie cabë' mandado rue lao ley. Cala sudyi'ilënë' Diuzi ta gata' yela' neban quienë' tuzioli como dan' rguixogue'n lë'ë guichi la'iya caniga: "Nu ben' hue quie yugulute cabë' mandado rue lao ley, gata' yela' neban quienë' tuzioli." Cana' rnën lë'ë guichi la'iya.

¹³Nun quie guti Cristo lë'ë yaga cruzo. bibdze'de' Diuzi ra'o, bdze'de'në' Cristo lao lazaro. Cana' rguixogue'n lë'ë guichi la'iya quie Diuzi cani: "Udze'de' Diuzi yugulu ben' na'ala' lë'ë yaga ta gatinë'." Cana' na lë'ë guichi la'iya quie Diuzi. ¹⁴Cana' guca quie

Cristo cuenda huela'iya Diuzi ben' binaca ben' Israel. Como dza na'te bega'nlë Diuzi Abraham di'idza' ta huela'iya Diuzi yugulu benë' tanun quie Abraham, na'ra lao na'a Cristo Jesús nuela'iya Diuzi ben' binaca ben' Israel, ben' nao xneza Cristo. Cana' bzu Diuzi di'idza' ca di'idza' bega'nlnënë' Abraham. Cana' aose'ela' Diuzi Bichi Be quienë' ta gacalënë' ra'o tanun quie dan' rzudyi'ilëro Cristo.

Ni rguixogue'n quie di'idza' bega'nlë Diuzi Abraham dza na'te

¹⁵Na'ra, bicha', re'enda' inia' le'e tu di'idza' quie nu ben' re'en chasa guichi quie. Caora chasa guichi tzu'un firma ta yega'ntza'oro, na'ra bisaque' uquinoron, bisaque' inaro di'idza' tula. ¹⁶Pues bega'nlë Diuzi Abraham len ži'isubanë' di'idza' dza na'te. Pero birnën lë'ë guichi de que bega'nlë Diuzi zë ži'isubanë' di'idza', dechan' rnën bega'nlnënë' tuzi ži'isubanë' di'idza', lena' tziõe'ero bega'nlnënë' ži'isuba Abraham, ben' naca Cristo, di'idza'. ¹⁷Caniga nacan ta inia' le'e: Dyë'ëdi bega'nlë Diuzi Abraham di'idza' dza na'te. Quie lena' cati baode tapa gayuhua galobechi iza, caora na' pca'n Diuzi ley quienë' lao na'a Moisés. Pero lëley na' bisaque' uquinon con cabë' rna di'idza' bega'nlë Diuzi Abraham. ¹⁸Chi tali na' ruen zi hue quiero cabë' mandado rue lao ley tacuenda gata' yela' neban quiero tuzioli, na'ra bisaque' inaro gata' yela' neban quiero tuzioli tuzi tanun quie dan' sudyi'ilëro Cristo. Pero bega'nlë Diuzi Abraham di'idza' de que tuzi tanun quie dan'

uzudyi'ilënë' lëbë' gata' yela' neban quienë' tuzioli.

¹⁹Na'ra, ¿ga hue dyin ley pca'n Diuzi lao na'a Moisés? Pues tanëro bega'nlë Diuzi Abraham di'idza', na'tera pca'nnë' ley quienë' lao na'a Moisés tacuenda inezi yaca benëchi' de dula' xquia quieyaquë'. Pero cala tuzioli hue ley na' dyin. Cati babdyin Cristo, ben' naca ži'isuba Abraham, ben' bega'nlë Diuzi Abraham di'idza', na'tera babeyudyi quien. Lëscan' inia' le'e itu di'idza': Caora pca'n Diuzi ley quienë', tanëro pca'nnë' lao na'a yaca ángel, na'tera pca'n yaca ángel ley na' lao na'a Moisés. ²⁰Pero caora bega'nlë Diuzi Abraham di'idza' dza na'te, tu cuinzi Diuzi bega'nlë'në' Abraham di'idza', nunu ángel, nunu ben' tula use'elë'.

**Ni rguixogue'n ga hue
dyin ley quie Moisés**

²¹¿Ca biži inaro? ¿Inaro birutila di'idza' ley na' cabë' naca di'idza' bega'nlë Diuzi Abraham? iBireya'ala' inaro cana'! Porque chi saque' gata' yela' neban quiero tuzioli tanun quie dan' hue quiero cabë' mandado rue bitezi ley, na'ra tanun quie lëley na' gata' yela' neban quiero tuzioli. ²²Pero yuguluro rue dula' xquia quiero ra'o mandado. Dyë'ëdi rguixogue'n cana' lë'ë guichi la'iya quie Diuzi. Quie lena' nu ben' sudyi'ilë Cristo, con lëzin gata' cabë' di'idza' una Diuzi huenë' quiero.

²³Tu bineguida Cristo lao yedyi layu, bë ley quie Moisés ra'o mandado. Guca quiero ca quie ben' rbeza yero lu'u dyiguiba. Ulezaro

guida Cristo uzioñe'enë' ra'o ta sudyi'ilëro lëbë'. ²⁴Naca ley quie Moisés ca quie nu maestro escuela, ben' napa xcuidi'. Cana' udapa ley ra'o tu bineguida Cristo lao yedyi layu ta sudyi'ilëro lëbë', na' yezi'že Diuzi dula' xquia quiero, ilë'ënë' ra'o ben' laxta'o yëri. ²⁵Pero na'a babida Cristo, abdyin hora sudyi'ilëro lëbë'. Quie lena' bira rapa ley quie Moisés ra'o ca nu maestro escuela, bira huen ra'o mandado.

²⁶Na'a banacale ži'i Diuzi tanun quie rzudyi'ilële Cristo banuelenë' tuže. ²⁷Yugulule banaole xneza Cristo bagozole nisa ta ulu'en banuele Cristo tuže. Quie lena' barlë'ë Diuzi le'e cabë' rlë'ënë' Cristo. ²⁸Nacaro tuzi la'acazi ben' Israel, la'acazi ben' za' yedyi tula, la'acazi ben' naca ca preso, la'acazi ben' rda libre, la'acazi be'mbyu, la'acazi nigula. Chi banuero Cristo tuže, nacaro tu cue'ziro. ²⁹Chi banuero Cristo tuže, banacaro dugalo ži'isuba Abraham. Hue Diuzi quiero yugulu cabë' di'idza' bega'nlë Diuzi Abraham dza na'te.

4 ¹⁻²Cani naca tu di'idza' ca re'enda' inia' le'e: Inaro uzu tu ben' uña'a. Gutiguë' pca'nnë' ta de quienë', uži' tu ži'inë' byu quienë' len. Pero como nenacatebi' xcuidi', biužaque' gaca lao na'abi' len. Re'ennan gapa ben' tula len cuidado hasta idyin dza ca una xuzibi' gaquen quiebi'. Como binedyin hora gaque quiebi' ta de quie xuzibi', tu lëbizi nacan quiebi' ca quie ben' nada'o. Cabë' bigaquen quie ben' ruezdi dyin žan yu'u, cana' binaquen quiebi'. Pero cati idyin

hora, na'ra gaquecazin quiebi'.
³Lëscana' naca quiero. Tu binedyin Cristo nerue dula' xquia quiero ra'o mandado. ⁴Pero cati bdyin hora, na'tera use'ela' Diuzi ži'inë'. Bi'a tu nigula lëbë', gologuë' naquë' ben' Israel, bë quienë' cabë' mandado rue lao ley pca'n Diuzi lao na'a Moisés. ⁵Cana' bidë' ulionë' pca'nnë' ra'o libre. Bira hue ley pca'n Diuzi lao na'a Moisés ra'o mandado. Cala tanun quie ley na' ilë'ë Diuzi ra'o como ca ži'inë'.

⁶Na'ra ta ulu'en tali nacaro ži'i Diuzi, use'ela' Diuzi Bichi Be quienë' lao na'a ži'inë' Jesucristo, uyu'unë' lu'u guicho laxta'oro. Quie lena' ru'en lato yëbiro Diuzi: "Xuza' luë'."
⁷Cana' naca quiero. Banacaro ži'i Diuzi, bira nacaro ca ben' nada'o, ben' binaca familia. Na' como nacan tali nacaro ži'i Diuzi, cana' gun Diuzi ra'o yela' neban quiero tuzioli tzazuro guibá.

**Rdëbi Pablo ca raca quie
ben' nao xneza Jesús**

⁸Pero dza na'te cati binehuebë'le Diuzi, taže bedzagalaole lële diuzi quiele dechan' cala diuzi. ⁹Pero na'a banuebë'le Diuzi (o mejorla inaro banuebë' Diuzi le'e), žibiži raca quiele yezulaole yenaole pensari bibizaca', pensari bihue dyin, na' yezi'le tazi' yuda' xcu'udzule tatula?
¹⁰Neruele nenaole quie dza, quie biu', quie tiempo, quie iza, cabë' mandado rue lao ley pca'n Diuzi la'o na'a Moisés. ¹¹Rdzeba' te cana'zi dyin bia' conlë le'e dza na' udixogui'a le'e xti'idza' Diuzi.

¹²Bicha', du guicho du la'adya' inia' le'e: Tzu'ule ca pensari quia', porque

rdëbida' cabë' raca quiele. Na'ra dza na' bëlële në'ëdi' tadya'a. ¹³Dyë'ëdi nezile cabë' guca quia' guca žhui'a cati uzulaohua' udixogui'a le'e xti'idza' Diuzi dza na'. ¹⁴La'acazi guquele zëdi cati guca žhui'a, bipsanla'adyi'le në'ëdi', bibële yaladyi' conlë në'ëdi'. Dechan' uzule gusto, blë'ële në'ëdi' dza na' ca quie tu ángel quie Diuzi, blë'ële në'ëdi' cabë' rlë'ële Jesucristo. ¹⁵¿Biži guca quiele, bira zulële në'ëdi' gusto? Nezda' chan' užaque' dza na', uliole yolaole bënle quia' cuenda yelë'ëda' dyë'ëdi. ¹⁶¿Biži guca quiele barlë'ële në'ëdi' ben' mala na'a, la'acazi di'idza' li rguixogui'a le'e?

¹⁷Na' yaca ben' re'en hue quie cabë' mandado rue lao ley pca'n Diuzi lao na'a Moisés, lega re'enyacuë' huelëyaquë' le'e tuže, pero cala ta gacalën le'e. Re'enjë' usanla'adyi'le nëto' cuenda gacalële leyaquë' tuže. ¹⁸Quele tamala na' huelë benë' le'e tuže, pero reya'ala' tzu'uyaquë' pensari dya'a ta gacalëyaquë' le'e. Pero reya'ala' gacalëjë' le'e yugu dza, cala yaca dzazi cati zulia' le'e. ¹⁹Ži'ina' dao' quia', tatula redzagalaohua' nun quiele ca redzagalao tu nigula re'en galo xcuidi' quie. Ni zua' rdëbida' quiele hasta yenaole xneza Cristo dyë'ëdi tatula. ²⁰Tahuen na' chan' zulia' le'e na'a cuenda hue'lia' le'e di'idza' dyë'ëdi, pero birzaque'da' bihua' quiele como zua' zitu'.

**Pablo pxi'idze'në' tu ejemplo
quie tu nigula lao Agar len
itu nigula lao Sara**

²¹Le'e ben' re'en hue quie cabë' mandado rue lao ley pca'n Diuzi lao na'a Moisés, ulena chi nezile dyë'ëdi cabë' rguixogue'n

lë'ë guichi ley na'. ²²¿Bizi raza quiele bineyele cabë' nan? Pues rnën quie Abraham unita' chopa xcuidi' byu quienë'. Tubi' nacabi' ži'i ben' nada'o laohuë' Agar. Itubi' nacabi' ži'i nigula quiecazinë' laohuë' Sara. ²³Na'ra ži'i nigula nada'o, tu golezibi'. Pero ži'i nigula quiecazinë', golobi' ta uzu di'idza' ca di'idza' bega'nlä Diuzi Abraham dza na'te. ²⁴Con cabë' guca quie chopa nigula, nacan tu ejemplo ta ineziro ca naca chopa cue' compromiso bega'nlä Diuzi yaca ben' Israel dza na'te. Ga zu lë'ë ya'a laona Sinaí, lëgan' na' bëlë Diuzi ben' Israel tu cue' compromiso, pca'nnë' ley quienë' lao na'a Moisés. Na'ra ca naca quie Agar, ben' nada'o quie Abraham, cana' nacarë quie ben' rue quie cabë' mandado rue lao ley pca'n Diuzi lao na'a Moisés. Nacajë' ca quie ben' nada'o, naca ley ca quie xa'një', binacajë' libre. ²⁵Pues na' como banaca quie Agar, cana' nacarën quie lë'ë ya'a Sinaí ta nega'nnan yu nebaba ben' Arabia. Lëscan' nacarën cana' quie ciudad Jerusalén ta zu yedyi layu nun quie dan' rue ley quie Moisés yaca ben' nita' ciudad Jerusalén mandado. Hasta yugulu ben' Israel ruen mandado quieyaquë'. Naca ley quie Moisés ca quie xa'nyaquë' nun quie dan' ruen quieyaquë' mandado. ²⁶Pero ra'o nacaro ben' ciudad Jerusalén ta zu guibá. Cana' nacaro ben' libre bira ruen ley quie Moisés ra'o mandado. ²⁷Lena' rguixogue'n lë'ë guichi la'ya quie Diuzi cani:

Reya'ala' yedaohuero ra'o ben' naca ben' ciudad Jerusalén ta zu guibá.

Bira naca ciudad quiero ca quie tu nigula huidyi', ben' biru'a xcuidi'.

Bira naca ciudad quiero ca quie tu nigula binuebë' yela' re rla cati ralo xcuidi'.

Porque huida ben' zë gula, ben' inita' ciudad Jerusalén ta zu guibá.

Pero bira inita' ben' zë ciudad Jerusalén ta zu yedyi layu.

Cana' rguixogue'n ra'o.

²⁸Na'ra, bicha', re'enda' inia' le'e tu di'idza': Cabë' bega'nlä Diuzi Abraham di'idza' golo tu ži'inë' Isaac, cana' naca quiero. Yela' nao xneza Cristo quiero nacaro ži'isuba Abraham según ca di'idza' bega'nlä Diuzi Abraham dza na'te. ²⁹Pero cabë' guca dza na'te, psaca ži'i nigula nada'o quie Abraham ži'i nigula quiecazi Abraham bizinaquezi, cana' racarë quiero na'a. Yaca ben' rue quie cabë' mandado rue lao ley quie Moisés, rusacajë' ra'o, ben' yu'u Bichi Be quie Diuzi lu'u guicho laxta'ohue, bizinaquezi. ³⁰Pero ¿bizi rguixogue'n lë'ë guichi la'ya quie Diuzi? Pues rguixogue'n de que gudyi Diuzi Abraham ta usannë' quie nigula nada'o quienë' lënë' ži'inë', como dan' bisaque' yega'n lao na'a ži'i nigula nada'o quienë' ta de quienë'. Nacacazin ta yega'nnan lao na'a ži'i nigula quiecazë'.

³¹Cana' rguixogue'n ra'o, bicha'. Binacaro ži'i nigula nada'o quienë', dechan' nacaro ži'i nigula quiecazë'.

Bihuero lato initi libertad quiero

5 Dyin bë Cristo nacaro libre, bira rue ley quie Moisés ra'o

mandado. Na' gapale cuidado bihuele lato initi libertad quiele. Bira uda'le tazi' xcu'udzule tatula ta bisuele hua'ale.

²Ulezënaga dyè'ëdi ca rnia' në'ëdi', Pablo. Chi huele lato su tu xëdyidao' cuinle, chi por lena' huele pensari yezi' Diuzi le'e, na'ra cabè' bē Cristo para le'e, bibi zaca'n para le'e lao Diuzi. ³Tatula quixogui'a le'e: Nutezi ben' ru'e lato su tu xëdyidao' cuine, yela' na' huenè' pensari por lena' yezi' Diuzi lēbē', na'ra nacan obligación quienè' huenè' yugulu ca mandado rue lao ley quie Moisés. ⁴Chi huele pensari yezi' Diuzi le'e tanun quie dan' rue quiele cabè' mandado rue lao ley quie Moisés, quie lena' apsanla'adyi'le Cristo, aoru'unle tzala'la yela' racalē Diuzi. ⁵Pero binacan cana' quiero. Rbezaro yezi' Diuzi ra'o tanun quie dan' rzudyi'ilēro Cristo baoyu'u Bichi Be quie Diuzi lu'u guicho laxta'oro. ⁶Chi banuero Cristo Jesús tuže, gabi huenan chi zuro, chi bizuro, tu xëdyidao' cuinro ca mandado rue lao ley. Tu ta reya'ala' huero, reya'ala' inaoro xneza Cristo edyè'ëro laguedyiro.

⁷Le'e unita' dyè'ëdi dza na'. ¿Nuži bē mandado apsanla'adyi'le bira rue quiele xti'idza' Diuzi? ⁸Binaca quie Diuzi cabè' ruele. Pues ulio Diuzi le'e ta gacale ben' quienè'. ⁹Bigala'adyi'le ca naca quie cuba yēta xtila. Conlē ilē'ëti' levadura ila'adyin dužete cuba. ¹⁰Nužela'adya' gacalē Cristo le'e ta huele pensari ca pensari quia'. Pero hue Diuzi castigo nu ben' rda rutēbi guicho laxta'ole. Nutezi ben' rue cana' huenè' lējē' castigo.

¹¹Nita' ben' na nere'enda' sua' tu xëdyidao' cuin yaca ben' nao xneza Jesús. Nayaquè' rguixogui'a chi bizu xëdyidao' cuin yaca ben' nao xneza Jesús, biyezi' Diuzi leyaquè'. Pero cala lena' rguixogui'a. Chi tali lena' rguixogui'a, birdza' yaca ben' Israel në'ëdi'. Chi tali lena' rguixogui'a, birdza'yaquè' cabè' rnia' quie Cristo rnia' gutinè' lē'ē yaga cruzo ta yeži dula' xquia quiero. ¹²Pero quie nu ben' rda rutēbi guicho laxta'ole, ben' rēbi le'e biyezi' Diuzi le'e chi bizu tu xëdyidao' cuinle, na'ra mejorla tu chi'zi ichugule quiejē', bira huele lato huelēyaquè' le'e zēdi.

¹³Pero le'e, bicha', ulio Diuzi le'e cuenda gacale libre inaole xneza Cristo. Quie lena' bireya'ala' huele ta rnazin quiele. Mejorla gacalēle laguedyile edyè'ële laguedyile. ¹⁴Porque chi edyè'ëro laguedyiro cabè' nedyè'ëro cuinro, con tuzi len barue quiero cabè' yugulu mandado rue lao ley quie Moisés. ¹⁵Pero chi tilalēro gacažē'ro laguedyiro, reya'ala' gaparo cuidado, porque ruen žudyi udyiagui'ro laguedyiro, na' udyiagui'ro cuinro.

Bihuero ta rnazin quiero, huero ca mandado rue Bichi Be quie Diuzi ra'o

¹⁶Cani rguixogui'a le'e: Ulehue quiele ca mandado rue Bichi Be quie Diuzi le'e. Chi huele cana', huabezan quiele dan' rnaban huele ta rnazin quiele. ¹⁷Porque chi huele ta rnazin quiele, lena' rdilalēn Bichi Be quie Diuzi. Pero chi hue quiele ca mandado rue Bichi Be quie Diuzi, lena' gacalēn le'e ta bihuele ta rnazin quiele. Cana' nacan porque rdilalē

pensari quiele le'e, bire'ennan hue quiele cabè' mandado rue Bichi Be quie Diuzi. Quie lena' ruen zèdi quiele huele ca reya'ala' huele. ¹⁸Chi rue quiele cabè' mandado rue Bichi Be quie Diuzi le'e, na'ra bira rue ley quie Moisés le'e mandado.

¹⁹Dyè'èdi neziro ca rue ben' rue ta rnazin quie. Rdalèyaquè' nigula binaca quieyaquè', ruejè' bayatza, biredue'yaquè', ²⁰rionla'adyi'yaquè' yo yaga, ruejè' yela' brujo, rguiloyaquè' dila, racazè'yaquè' laguediyaquè', rdzajè' benè' con ganzi, quiezijè' re'enjè' gaca huen, rguiloyaquè' rbèchiyaquè' tu cue' ben' quieyaquè'. ²¹Nacajè' ben' zè', rutijè' benè', rdajè' hue'e, raojè' con ta riè'èyaquè', tazèla tamala naoyaquè' rueyaquè'. Tatula inia' le'e cabè' gudya' le'e dza na'te: Biezei' Diuzi nu ben' rue cana'.

²²Pero netza' ca rue ben' yu'u Bichi Be quie Diuzi. Nadyè'èyaquè' laguediyaquè', sujè' gusto, rbe' chizi guicho laxta'ojè', nacajè' ben' žela'adyi', rapajè' laguediyajè' bala'ana, nacajè' ben' huen, ben' ruzu di'idza'. ²³Biruejè' že cuinjè', biruejè' ta rnazin quieyaquè'. Para ra'o, ben' yu'u Bichi Be quie Diuzi, birabi ley de ta ichugubè' cabè' ruero. ²⁴Chi banuero Cristo tuže, na'ra apsanla'adyi'ro bira huero ta rnazin quiero. Ca naca quie ben' baguti, bira saque' huejè' ta rnazin quieyaquè', cana' naca quiero, bira saque' huero ta rnazin quiero. ²⁵Pues ca naca quiero yu'uro Bichi Be quie Diuzi, cana' reya'ala' huero lato inabè'nè' ra'o ca huero.

²⁶Quie lena' bireya'ala' huero cuinro ben' že. Bireya'ala' utituro

laguedyiro ta idza'yaquè' ra'o, nica yežè'ro laguedyiro.

Reya'ala' gacalèro laguedyiro

6 Bicha', chi ga nezile zu tu ben' nao xneza Cristo, pero napè' xquia, le'e ben' rue quie dyè'èdi quie Bichi Be quie Diuzi, reya'ala' gacalèle lèbè' ta usannè' bira gapè' xquia. Hue'lèronè' di'idza' žela'adyi'. Gaparo cuidado cuinro, bihue'ro lato iquixiro ugaparo xquia cuinro. ²Lèscan' reya'ala' gacalèro laguedyiro ca tazèdi raca quieyaquè'. Chi huero cana', cana' hue quiero huero cabè' mandado bè Cristo ra'o.

³Chi huero cuinro ben' že, chi bire'enro bigacalèro laguedyiro, cana' barzi'ro yè' cuinro. ⁴Yuguluro reya'ala' huero pensari chi nacan huen, chi binacan huen cabè' ta ruero. Chi neziro tali nacan tahuen cabè' ta ruero, na' reya'ala' suro contento, bihue'ro lato utèbin ra'o ca ina yaca los demás benè'. ⁵Yuguluro reya'ala' huero bala ca naca ta raca quiero.

⁶Nu ben' ruzioñe'e ra'o xti'idza' Diuzi, reya'ala' gacalèrojè' con ta de quiero.

⁷Bisi'le cuinle yè'. Nunu saque' utitu Diuzi. Naca quiero ca quie ben' raza bini. Ca ta gazaro layu, de yezi'ro cosecha quien. ⁸Chi hue benè' ta rnazin quiejè', na'ra lena' udyiaguin' lèjè' lao Diuzi. Ruen žudyi biezei' Diuzi lèjè', na' bigata' yela' neban quiejè' tuzioli. Pero chi hue nu benè' con cabè' rna Bichi Be quie Diuzi, chi hue quieyaquè' quienè', na'ra gata' yela' neban quieyaquè' tuzioli. ⁹Cana'

biyuhuēdiro huero tahuen, porque chi biyuhuēdiro huero tahuen, huela'iyā Diuzi ra'o caora idyin hora. ¹⁰Quie lena' reya'ala' gacalēro nutezi benē', reya'ala' huero tadya'a quieyaquē'. Lēscana' ta naca belao na' gacalēro ben' bichiro, ben' nao xneza Cristo.

**Ga beyudyi di'idza' bzu
Pablo lē'ē guichi**

¹¹Ulena'cara ca letra yela ruzua' lē'ē guichi ni conlē na'a cuina'.
¹²Biruejē' huen yaca ben' re'en uzu tu xēdyidao' cuinle cabē' mandado rue lao ley quie Moisés. Rdzebijē' idza' ja ben' Israel lējē' chi quixogue'jē' tuzi sudyi'ilēro Cristo, ben' guti lē'ē yaga cruzo, con lēzin yezi' Diuzi ra'o. ¹³Pues nu yaca ben' babzu tu xēdyidao' cuine cabē' mandado rue lao ley quie Moisés, nica lējē' birue quieyaquē' yugulu di'idza' cabē' mandado rue lao ley na'. Pero re'enjē' su tu xēdyidao' cuinle cuenda gacajē' ben' že lao laguedyiaquē', dan' bējē' gan zule tu xēdyidao'. ¹⁴Pero por tu parte quia' nē'ēdi', birguiloga' bi hua' ta gaca ben' že lao laguedya'. Tuzi

ca re'enda', re'enda' gaca' ben' že lao Jesucristo, ben' guti lē'ē yaga cruzo ta yeži dula' xquia quiero. Binacan belao chi ilē'ē yaca benē' nē'ēdi' ben' že. Lēscan' binacan belao chi ilē'ēda' leyaquē' ben' že. ¹⁵Chi nacalēro Cristo tuže, bibi huenan chi zu, chi bizu tu xēdyidao' cuinro cabē' mandado rue lao ley quie Moisés. Pero ruenan zi usanro pensari gula quiero huero pensari cubi ta zaza'lē Cristo. ¹⁶Rulidza' Diuzi cuēchinē' chizi guicho laxta'ole yeyēchi'la'adyi'nē' le'e, ben' nuelē Cristo tuže, yu'ule pensari cubi ta zaza'lē Cristo. Rulidza' Diuzi por yugulu ben' nao xneza Cristo, ben' naca ben' quie Diuzi.

¹⁷Na'ra bira re'enda' huelēle nē'ēdi' zēdi ca naca di'idza' aodixogui'a le'e ni. Pues badyiacaza' zē xēdyi ga bēn yaca benē' nē'ēdi' zi', ben' rudie nē'ēdi' tanun quie dan' naohua' xneza Cristo. Lēxēdyi na' rulu'en naca' ben' rue quie cabē' mandado hue Cristo nē'ēdi'.

¹⁸Bicha', rulidza' Señor quiero Jesucristo ta huela'iyānē' le'e yugulule. Amén.